

Dood unner de Erlebeem

Doo hott doch vor e paar Woche unner de Erlebeem omm Bootshaus enn Doode geleesche, enn sechsunzwonnsischjährische Monn aus Flerschem mett Vornome Bernhard, genonnd Bernie, erschlaache mett emm Knibbel odder emm dicke Ast, awwer koon Knibbel unn koon Ast iss bei de Leich gefunne worrn.

De Bernie war spät owends mett soim Kummbeer Herrmonn, der sein Großvadder soi kennt, weiler bald Achtzisch iss, außem Herrsch eraus unn wollt iwwer de Domm hoomgieh. Weiler awwer nitt hoomkumme iss, hawwe sein Vadder unn soi Mudder mett Daschelombe noochem gesucht unn hawwen gefunne. Irschend ooner hadd dem Bernie uff de Kobb gehaache unn doodroo isser gestorwe.

„Wer mächden su ebbes?“, hawwe sisch die Leit gefroochd, „wer mächt donn midde in de Nacht unner de Erlebeem erum unn dut druff wadde, bis ooner kimmt, den er doodsclaache kann?“

„Ganz selten kommt so etwas vor“, hott die Bollizei gesaad, „wir müssen bei Bekannten von dem jungen Mann nachfragen, wer um diese Zeit nicht zuhause, also unterwegs gewesen ist. Solche Taten sind meist Beziehungstaten.“

Ess werdd also de erst im Bekonndekreis vunn su emm Ermordete gesucht unn nooch dem, der deletzdt mett emm geseh worrn iss.

Dessdeweesche hawwe die Beomte de Kummbeer vumm Bernie, de Herrmonn, uffgesuchd. Der hadd joo meddem Bernie im Herrsch gesetze unn iss sesomme meddem Bernie außem Herrsch eraus, dess hott die Werrtin vumm Herrsch de Bollizei verzählt.

Ob die zwaa sisch gestridde hädde, isse noch gefroochd worrn unn doo hottse ze Antwort gewwe, naa, die hädde sisch de gonse Owend unnerhalle, jeder hädde zwaa Bier gedrunke, de Herrmonn noch enn Kaffee hinnerher unn alles hädde de Bernie bezahld. Alles wär gons normal gewese, aach dene zwaa ihr Gesichter wärn nitt verzerrd gewese, was joo uffen Krach zwische dene hiegedeud hädde.

„Und draußen vor der Tür?“, hawwe se noch gefroochd, awwer doodefoo hott die Werrtin nix gewusst, weil die zwaa die letzte Gäst gewese sinn unn wie se fort warn hottse de Disch abge-roomd unn die Dier zugeschlosse.

De Herrmonn iss joo omm Gänskippel dehoom unn hott verzählt, er unn de Bernie hädde sich noch gedriggd unn donn wär de Bernie Rischdung Bootshaus unn er wär er in die onner Rischdung gonge.

„Warum also soll er seinem Freund etwas tun?“ Dess hott sisch die Bollizei gefroochd unn also war de Herrmonn erst emol eraus aus de Ermittlung. Die Bollizei hott donn noch die Eldern gefroochd, ob de Bernie e Freundin gehabbd hädde unn wenn, duts villeischd enn Kerl gewwe, der die aach hawwe wollt? Aach dess war nitt de Fall, de Bernie hadd sisch noch nitt umgeguggd.

„Hatte der Bernie vielleicht viel Geld bei sich, das dann bei der Leiche nicht mehr zu finden war?“ Naa, dess aach nitt, weil im Bernie soim Portmonnee warn grad noch e paar Euro droi unn soi Mudder hott gesaad, mieh als zwonnsisch Euro hott de Bernie nie oistigge gehabbd, warum aach, er wollt joo nor meddem Herrmonn ooner drinke gieh.

Die gons Sach war also nitt uffzeklärn, weil aach onn de Klaader vumm Bernie nor die DNA-

Spurn vumm Herrmonn gefunne konnde werrn, weil die zwaa sisch joo vorm Fortgieh gedriggd hadde, also dass koon onnern ihn beriehrd hatt bevor dem Bernie uff de Kobb gehaache worrn iss.

„Vielleicht hat der Mörder den Bernie mit irgendjemand verwechselt?“, hott su enn junge Bollizist sein Chef gefroochd. „Wurde einem anderen Burschen also aufgelauret und nur zufällig hat es den Bernie getroffen?“

Dess iss enn gute Oosatz gewese, denn jetzt konnt merr suche nooch oom, der su gruß unn su blond wie de Bernie gewese unn aach effderr mol spät owends unner de Erlebeem unn iwvern Domm hoomgonge iss.

Also hawwe se in de Edderschemer Strooß unn weider in de Siedlung nooch su emm junge Monn gesucht unn hawwe aach zwaa gefunne, awwer kooner vunn dene konnt de Merrder gewese soi, die warn alle zwaa dehoom bei ihrne Eldern unn hadde sesomme mett dene enn Krimi geguggd.

Jetzt muss merr awwer wisse, dass de Bernie e Buch gemachd hott, dess schunn fuffzisch-dausendmol vekaaft unn in die Bestsellerlist vumm „Stern“ unn vumm „Spiegel“ uffgenomme worrn iss.

Awwer aach de Herrmonn hott e paar Bischer geschriuwe, su iwver Flerschem unn soi Geschicht, awwer mieh wie hunderd vunn jedem vunn dene hott de Buchhonnell nie vekaafe kenne.

Als de Honnes vunn de Flerschemer Zeidung doo druffkumme iss, hodder sich dess Buch vumm Bernie kaaft unn hott sichs genau oogeguggd. Weil de Herrmonn dem Honnes schunn vor emm Johr verzähld hadd, dass er jetzt emol e onner Sort Buch schreibe deet, nix vunn Fler-

schem, unn vunn dem, su hott de Herrmonn ge-
moond, deeder bestimmt zwaahunnerd Stick ve-
kaafe. Awwer vunn was dess Buch honnele dut
hodder nitt verrode, du konnsd ess joo mol lese
wenns ferrdisch iss, hott de Herrmonn zum
Honnes gesaad.

De Honnes hott also nitt nor dess neie Buch
vumm Bernie, naa, aach oons vunn soine vorher-
giehende Bischer kaaft, hott enn Zeddel unn enn
Kuli genumme unn die zwaa Bischer in e paar
Daach uffmerksam gelese.

Als de Honnes die Bischer dorschgelese unn
soi Uffzeichnunge gemachd hadd, isser uff die
Bollizei gonge unn hott dene soi Sach vorgetra-
ache. Die Beomte hawwe gleisch in Fronkfort oo-
gerufe unn hawwe enn Spezialist ferr Literatur,
ferr Schreibstil unn su oogeforderd. Der iss kum-
me unn hott sich dess neie Buch unn aach die
zwaa onnern Bischer vumm Bernie kaafe losse,
hott sich aach die Bischer vumm Herrmonn
kumme losse, hott vergliche unn hott eindeudisch
unn genau wie de Honnes festgestellt, dass dess
neie Buch nitt vumm Bernie, naa, vumm Herr-
monn geschriwwe worrn iss.

Villeischd also, su hott de Spezialist de Bollizei
gesaad, hott de Bernie dem Herrmonn den Text
vumm Buch geklaut unn unner soim eischene
Nome veröffentlichd, unn weil dess su enn gru-
ße Erfolsch worrn iss, hott de Herrmonn de Ber-
nie doodgeschlaache.

De Spezialist hott donn de Honnes holle losse
unn den gefroochd, wie er als Heimatschriftstel-
ler, ohne su ebbes studierd ze hawwe, dess er-
kenne konnt, dass de Herrmonn unn nitt de Ber-
nie dess Buch geschriwwe hadd.

Doo hott de Honnes gesaad: „Isch habb im
Buch nooch Werrder gesuchd, vunn dene isch

genau gewissd habb, dass die de Herrmonn effderr benutze dut als onnern Buchschreiwere. De Herrmonn hott gern die Werrder ‚wohl‘ unn ‚gewiss‘ geschriwwe, jedes vunn dene uff hunnert Seite villeischd e Dutzend mol. Nooch dene Werrder habb isch gesuchd unn habb vill vunn dene gefunne unn dess hott merr die Gewissheit gewwe, dass de Herrmonn unn nitt de Bernie dess Buch geschriwwe hott.“

Wie die Bollizei donn de Herrmonn in die Zong genumme hott, hott der unner Träne zugewwe, dass der dem Bernie soi oonsisch Original uff Babier unn uff su emm Stick, also emm Datespeicher, zum Lese gewwe hott, awwer de Bernie hädds onn enn Verlaach geschickd unn der hädd dess gruß erausgebroschd, de Bernie hädd vill Geld verdiend unn hädd ihm, dem Herrmonn, nix defoo gesaad. Irschendwonn hädd de Herrmonn dess Buch im Buchhonnell geseh, sogar emm Herrmonn sein Buchtitel hädd de Bernie iwvernumme: „Mord auf dem Mars“, unn dess dut defoo honnele, wie bei ooner Expedition uffem Mars enn Wisseschafftler umgebracht worrn iss, weil der entdeckt hadd, dasses frieher Lebewese uff dem rode Planet gewwe hott unn sein Kolleesch die Entdeckung ferr sich hawwe wollt, weil de Finder vunn Lewe uffem Mars doodemett, wie merr su seet, in de Wisseschafft unsterblich werdd unn vorher gons sicher de Nobelpreis doodeferr kriecht.

De Herrmonn hott gejommerd: „Grad zwaa Bier unn enn Kaffee hott de Bernie ausgewwe unn debei gesaad, wenn du alder Kerl dess Buch eigereichd häddst wärs gar nitt gedruckt worrn. Mett mir konn de Verlaach in de nächsde Johnn vill Geld verdiene, hosde erst emol enn Nome im Buchgeschäft, werdd aach e nei Buch sofort fuff-

zischdausend Mol unn mieh vekaafd. Aach im Fernseh kumm isch die nächst Woch groß eraus unn bald werr isch noch mieh Bischer vekaaft hawwe. Ess iss halt su: Mett su emm Alde wie du kenne die koo Geschäfte mache, unn aach mett doim Nome iss nitt vill oozefonge: Wer will schunn e Buch vumm Herrmann Bohnenschneider lese? Awwer e Buch vumm Bernhard Jott Hochgleider, dess wolle die Leit hawwe.“

„Und dann?“, hott de Owwersde vunn de Bolli-zei gefroochd.

„Wie merr außem Herrsch enaus sinn bin isch erst e paar Meder in Rischdung Gänskippel gonge, habb misch donn awwer erumgedrehd unn bin dem Bernie hinnerher. Isch wolldem doch nor saache, isch will joo koo Geld vunn derr, awwer dass isch dess Buch geschriwwe habb, dess konnsde doch nächst Woch im Fernseh saache, odder?“

Doo hott de Bernie nor gelachd. „Isch gebb derr widder mol e Bier unn enn Kaffee aus, awwer doin Nome hott mett moim Buch nix ze due.“ Doo habb isch su enn Zorn kriecht unn weil isch Im Dunkele meddem Fuß onn enn starke Ast kumme bin, den de Wind vunn de Erlebeem erunnergeschmisse hadd, habb isch den uffgehowwe unn habben mett aller Wucht dem Bernie uff de Kobb gehaache unn debei gesaad: ‚Du mächst koo Geschäfte mieh mett moim Buch, dess hosde de-foo.‘

Den Ast habb isch donn in de Moo geschmisse, bin hoom unn habb misch ins Bett geleeschd. Ess kann soi, dass isch ins Kittsche kumme due, awwer donn habb isch joo vill Zeit. Weil isch habb schunn e Idee ferr moi nächst Buch vumm Mond unn soine friehere Bewohner unn donn werrd

merr seh, dass isch aach mett moim Nome Herrmann Bohnenschneider gruß erauskumme kann.“